

շէի տանը: Այժմ, ինչպէս երեւում էր, անձամբ եկել էր խորհրդակցել փաշայի հետ, կամ, գուցէ այդ նպատակով կանչուած էր նրանից:

– Դա մեր քաղաքի ոստիկանութեան պետն է, Լաթիֆ-բեկը, – առաջ տարաւ առաջնորդը: – Ամենապատուական մարդ եւ դրա շնորհիւ մեր քաղաքը կատարեալ հանգստութիւն է վայելում:

Ասլանը ձեռքը մեկնեց եւ դեպի այդ «ամենապատուական» մարդը, որ տեր Եղիշէի քրոջ՝ տիկին Թեյլի ամուսինն էր, եւ որին յանձնուած էր որոնել մատնուած Ասլանին: Նա բոլոր ժամանակ իր թաւ, խոժոռ յօնքերի տակից լուռ նայում էր Ասլանի վրայ: Թէ՛ քուրդ բեկը եւ թէ՛ ոստիկանութեան պետը՝ երկուսն էլ զենքերով էին նստած: Նայելով վերջինի վրայ, ես մտածում էի, որ այնպիսի բարի եւ ազնիւ կինը, որպիսին էր Թեյլի-խաթունը, մի կատարեալ գոհ պետք էր համարել այդ տեսակ գազանի ձեռքում:

Բացի քուրդ բեկից եւ ոստիկանութեան պետից, միւս հիւրերի թիւը շատ փոքր էր. նրանք երեք հոգի էին միայն, ազգով հայ: Առաջինի վրայ ցոյց տալով, առաջնորդը ասաց.

– Դա մեր հայ հասարակութեան առաջնակարգ անձինքներից մէկն է, Շարման-բեկը: Բոլոր արքունական շինածքների կառուցման կապալառութիւնը դրա ձեռքումն է, որ ապացոյց է իր մեծ հաւատարմութեան: Շատ ժամանակ չէ, որ արժանացաւ օգոստափառ սուլթանի շնորհած շքանշանին:

Եւ իրաւ, նրա կուրծքի վրայ փայլում էր մի շքանշան: Շարման-բեկի անունը լսելով, ես իսկոյն յիշեցի վարպետ Փանոսի մի հետաքրքիր պատմութիւնը արքունի զինոորանոցների կառուցման մասին: Այդ Շարման-բեկն էր, որ շինութիւնների բոլոր ծախքը հայ հասարակութեան տուժել տալով, միեւնոյն ժամանակ, նոյն ծախքը ամբողջապէս ստացաւ կառավարութեան գանձարանից եւ բաժանեց փաշայի կամ այլ պաշտօնական անձանց հետ: Այդ պատմութիւնը ես պիտի կրկնեմ, որ դու լաւ մտաբերես, ընթերցող:

Վանի շրջակայքում, կամ Պարսկաստանի սահմանի գծի վրայ, տաճկաց սահմանապահ զինորդները, զօրանոցներ չունենալով, սովորաբար միշտ բաժանուած էին լինում հայերի տներում օթեւանելու համար: Իւրաքանչիւր ընտանիք պարտաւորուած էր պահել մի քանի հոգի այդ հիւրերից: Ինքնակոչ հիւրը դառնում էր, միեւնոյն ժամանակ ընտանիքի տերը եւ նրա գլխաւորը: Տան հարսը, աղջիկը, կինը ծառայում էին նրան, որպէս աղախիւններ, տան տղամարդը հոգ էր տանում նրա ձիուն որպէս ծառայ: Թուլամորթ, որկրամուլ տաճիկ զինորդը չափազանց նուրբ ճաշակ է ստանում եւ խիստ պահանջող է լինում, երբ հայի տանը ձրի կերակրւում է: Իսկ երբ նրա պա-